

漱玉詞陽春集
得全居士詞澹菴長短句



澹
菴
長
短
句

胡
銓
著

中
華
書
局

叢書集成初編

漱玉詞（及其他三種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

澹菴長短句

此據別下齋叢書
本排印初編各叢
書僅有此本

澹菴長短句

廬陵 胡 銓

浣溪沙

忽忽春歸沒計遮。百年都似散餘霞。持杯聊聽浣溪沙。但覺暗添雙鬢雪。不知落盡一番花。東風寒似夜來些。

轉調定風波

和答海南統領陳康時

從古將軍自有真。引杯看劍坐生春。擾擾介鱗何足掃。談笑綸巾羽扇典刑新。試問天山何日定。佇聽雅歌長嘯靜。煙塵解道汾陽是人傑。見說如今也有謫仙人。

菩薩蠻

辛未七夕。嚴答張慶符。

銀河牛女年年渡。相逢未款還憂去。珠斗欲闌干。盈盈一水閒。玉人偷拜月。苦恨匆匆別。此意願天憐。今宵長似年。

減字木蘭花

慶符引教自便。已脫去。至東界。又遣郡中勾同。遂有弄璋之喜。慶符云。嘗夢舅氏如夢。也。于嘗占慶符當弄瓦。賭主人。慶符來嘗。故詞中具之。

渭陽佳夢。瓦變成璋。真妙弄。不是勾回。湯餅冤家喚得來。不分利市。要我開尊。真倒置。試問坡翁。此事如何著得儂。

醉落魄

辛未九月望。和客慶符。

百年強半。高秋猶在天南畔。幽懷已被黃花亂。更恨銀蟾。故向愁人滿。招呼詩酒顛狂伴。羽觴到手判無算。浩歌箕踞巾聊岸。酒欲醒時。興在盧仝盃。

又

和客陳景衡望湖樓見憶

千巖競秀。西湖好是春時候。誰知梅雪飄零久。藏白收香。空袖和薰手。天涯萬里情難逗。眉峯豈爲傷春皺。片愁未信花能繡。若說相思。只恐天應瘦。

鷓鴣天

癸酉吉陽。用山谷韻。

夢繞松江屬玉飛。秋風尊美更鱸肥。不因入海求詩句。萬里投荒亦
豈宜。青箬笠。綠荷衣。斜風細雨也須歸。崖州險似風波海。海裏風
波有定時。

又

和陳景衡憶西湖。

一憶西湖太瘦生。十年不到夢曾行。空濛山色煙霏晚。淡沱湖光霧
瀲灩。芳草遠。暮雲平。雨餘空翠入簾明。夢回一晌難存濟。這錯都
因自打成。

朝中措

黃守座上。用六一先生韻。

崖州何有水連空。人在浪花中。片嶼一聲橫竹。雲帆萬里雄風。多
情太守。三千珠履。二肆歌鐘。日下卽歸黃霸。海南長想文翁。

采桑子

甲戌。和陳景衡韻。

山浮海上青螺遠。決眚歸鴻。閑倚東風。疊疊曾雲欲蕩胸。弄琴細

寫清江引。一洗愁容。木杪黃封。賢聖都堪日日中。

臨江仙

和陳景衡憶梅

我與梅花真莫逆。別來長恐因循。幾年不見嶺頭春。惘然蝴蝶夢。魂夢竟非真。浪蘂浮花空滿眼。愁眉不展長顰。此君還似不羈人。月邊風畔。千里淡相親。

如夢令

誰念新州人老。幾度斜陽芳草。眼雨欲晴時。梅雨故來相惱。休惱。休惱。今歲荔枝能好。

玉樓春

贈李都監侍兒。是夕歌十六幺。

十年目斷鯨波闊。萬里相逢歌怨咽。髻鬟春霧翠微重。眉黛秋山煙雨抹。小槽旋滴真珠滑。斷送一生花十八。醉中扶上木腸兒。酒醒夢回空對月。

清平樂

和曾檢法海棠

深深花院。雨虐風饕。偏只欠畫屏并羽扇。誰領略春風面。愁須詩酒相禁。少陵底事慵吟。不是爲梅牽興。怕渠惱亂春心。

王介甫梅詩云。少陵爲爾牽詩興。可

是無心賦海棠。故云。

青玉案

乙酉重九葛守坐上作

宜霜開盡秋光老。感節物愁多少。塵世難逢開口笑。滿林風雨。一江煙水。颯爽驚吹帽。玉堂金馬何須道。且鬪取尊前玉山倒。燕寢香清官事了。紫萸黃菊。早羅紅袂。花與人俱好。